



角度

讀文科个妹仔學校正畢業，就對鄉下嫁到都市肚分生理人做心白。新婚三朝後，厥家官喊佢學處理店頭事務，像有關原料个批發出貨、送貨同款貨，還有記錄注文電話這兜微毛末節个事頭，佢每日無閒泊杈，做到有搭有確，對天光到暗晡頭，無日無夜做到兩頭烏，佢看到心肚蓋毋盼得。

恤起佢做細妹仔時節懦懦弱弱，看起來無三斤个雞公力，做起事來忸忸膩膩、驚燒怕冷，屋家雖然做農產品生理，毋過驚佢搬重毋贏，故所全毋敢使佢做事。無想著妹仔食另外一座井水後，身體變啊蓋砸壯，身妝肢骨也過作肉加蓋鬧斗，看佢做生理个樣式老成又有板，蓋有頭家娘个格式。原來恁有才情个妹仔，在屋家時節嗰無分佢好好啊展才華，同佢搵手賺加啊兩尖錢，這下正知得實在蓋浪忒。

妹仔初胎仔有身項，檢查到係攞妹仔屎，佢再三交代莫攞重个東西，晒衫褲時手毋好擎忒高，驚擲著攞肚个筋頭，會影響著身項个細嬰兒仔，上上下下愛細意毋莫橫倒地。厥家娘也蓋惜佢，惜到命肝樣，轉頭轉角會代佢做事，喊佢愛多休息。

每擺佢去坐寮時，親家且姆都盡說妹仔「蓋省做搭毋會亂花錢」，毋單淨做事情手腳蓋微頭，連灶下肚个灶頭鑊尾也打理到伶伶俐俐，間房肚个針頭線尾又也蓋來得，講去講轉都稱說客家心白蓋撓抓，聽著嫁人做祖婆个妹仔分對手親恁褒說，心肝肚蓋暢也蓋安慰。想起當初妹仔个婚姻正成事愛嫁該下，佢每日愁愁切切，緊謹自家全無教過妹仔煮過一餐飯，連蔥仔蒜仔都分毋清楚，也無分佢洗洗盪盪過，嫁過去半項都毋曉得，斯愛仰結煞正好，毋過這下想起來正式係加愁个。

做月十二朝過後，佢去山頂瑪家鄉畜放山雞个原住民屋家，買地六隻雞公仔分做兩隻雞籠仔跔，再載去分婿郎，且姆將雞籠仔放在工廠邊臂个桂花樹下，佢想一日刷一隻分心白食較新鮮。佢同且姆講這種山項放野畜个雞仔食青草、菜葉、蟲蟪仔搭砂石大个，畜有半年零地，較老氣、肉質較硬健、過有雞肉香，炒麻油雞酒會過好食。

哪知頭暗晡會認床个雞公仔嗰睡毋得，二更就開始啼一陣，一隻比一隻聲說過烈，蓋像唱歌仔比賽，三更~四更~五更~逐更六隻都輪等啼，吵到隔壁鄰舍睡毋得，第二朝晨天官光，該兜過早跔个老人家就過來話且姆，講半夜兩三點就分雞啼聲吵醒，害且姆緊同佢等會失禮以外，還共快將該六隻半夜會跔起來唱山歌个雞公仔捉去刷。

頭擺人講：「降子過學堂，降女過家娘。」一息都毋會爭差。細妹人菜仁仔樣，掖到哪生到哪，嫁雞從雞，嫁狗就學掌屋，嫁猴仔愛滿山走，只愛肯做肯打拚，就係成功个人。

作者：謝惠如

☆詞彙學習☆

【忸忸膩膩】nug nug ne ne：猶豫不前。

【作肉】zog` ngiug`：肥胖。

【鬧斗】nau deu`：漂亮。

【格式】gied` siid`：有模有樣。

【微頭】mi` teu`：動作快又好。

【撓爪】nau` zau`：聰明又伶俐。

【對手親】dui su` qin`：親家。

【愁愁切切】seu` seu` qied` qied`：擔憂。